

BAGAIMANAKAH DIKIRA BATAL SEORANG ITU KETIKA DIA DI DALAM SEMBAHYANG

بِسْمِ اللّٰهِ الرَّحْمٰنِ الرَّحِیْمِ

الحمد لله رب العالمين والصلاة والسلام على أشرف الانبياء المرسلين وعلى آله وصحبه أجمعين.

Sukacita pihak kami menjelaskan perkara-perkara yang membatalkan sembahyang seperti berikut:-

1. Bercakap atau berkata-kata dengan sengaja pada hal diketahui bercakap di dalam sembahyang itu haram, sekalipun kata-katanya itu tidak memberi faham apa-apa atau satu huruf yang memberi faham seperti " قِ " (Qi) maknanya jaga atau kawal.
2. Melakukan perbuatan yang banyak berturut-turut seperti melangkah tiga langkah berturut-turut, samada sengaja atau terlupa batallah sembahyangnya.
3. Berhadas samada hadas kecil atau hadas besar seperti terkentut di dalam sembahyang.
4. Terkena najis yang tiada dimaafkan pada badannya dan pakaiannya, sekiranya dapat dielakkan najis yang terkena pada pakaian dengan segera seperti terkena najis pada songkoknya lalu ditinggalkan dengan segera maka tidak menyebabkan batal sembahyangnya.
5. Terbuka aurat yang termaklum dalam sembahyang, tetapi jika terbuka aurat dengan sebab ditiup angin dan ditutup segera, maka tidaklah membatalkan solat selagi keadaan itu tidak berulang-ulang atau berturut-turut.
6. Berubah niat seperti niat ingin keluar daripada sembahyang atau ragu-ragu hendak keluar atau tidak sembahyang tersebut.
7. Berpaling daripada kiblat dengan dada ke kiri atau ke kanan, sekalipun dengan sebab dirempuh atau ditolak orang.
8. Makan dengan sengaja, samada sedikit atau banyak, walaupun sebutir nasi, kecuali jahil atau terlupa.
9. Ketawa dengan bunyi yang boleh mengeluarkan suara mengandungi dua huruf atau satu huruf yang boleh memberi faham melainkan terdorong ketawa sedikit yang tidak dapat ditahan.

10. Murtad wal-iyazubillah (والعياذ بالله) samada dengan perkataan atau perbuatan.

Selain daripada sepuluh perkara tersebut, ada lagi beberapa perkara lain yang membatalkan sembahyang seperti berikut:

1. Ma'mum mendahului imam atau ketinggalan daripada imam dengan dua rukun tanpa ada uzur.
2. Memanjangkan rukun yang pendek dengan sengaja, seperti iktidal (إعتدال) dan duduk antara dua sujud.
3. Meninggalkan perkara nrukun atau syarat-syarat sembahyang dengan sengaja tanpa ada uzur.

Demikianlah penjelasan kami mengenai perkara-perkara yang membatalkan sembahyang mudah-mudahan ada memberi munafaatnya.

Disediakan oleh:

Pejabat Mufti Negeri Sabah.

30/4/2003 M

27 Safar 1424 H

